

IZJAVA RADNIKA BENZINSKE PUMPE

Na dan 21.02.2018. godine, nekoliko minuta nakon što sam počeo rad u trećoj smjeni, u prodajni prostor naše pumpe upala su tri momka, od kojih je jedan odmah prišao pultu sa pištoljem tražeći da ispraznim kasu u plastičnu vrećicu, u koju sam stavio sav novac koji se nalazio u kasi, uključujući kovanice. Drugi pljačkaš je uzimao cigarete i druge proizvode i stavljao ih u torbu. Nakon toga sam ga čuo kako psuje i lupa po objektu. Ponašao se veoma nasilno i nekontrolisano. Ne sjećam se detalja u vezi njega, jer sam bio u stanju šoka i fokusiran na momka u mojoj neposredno blizini.

Nakon par minuta u objekat je stupio nepoznati muškarac koji je zatekao momke na djelu. Muškarac je odmah nasrnuo na momka sa pištoljem i savladao ga bez povrede, dok je momak sa palicom zgrabio vrećicu sa novcem i pobjegao u nepoznatom pravcu. Nisam znao ko je muškarac koji je intervenisao, ali se činilo da je prošao neku obuku, jer je lako onesposobio momka sa pištoljem.

Nakon što mu je oduzeo pištolj, iz džepa je izvadio policijske lisice, po čemu sam zaključio da se radi o policajcu u civilu. Dok je stavljao lisice na momka morao je biti grublji, jer je momak nastavio da se opire i psuje. U jednom trenutku ga je naglo povukao za desnu ruku kako bi zaključao lisice i momak je uzviknuo u bolu. Činilo se da je povrijeđen. Policija je stigla nakon petnaestak minuta, i preduzeli su dalje radnje u vezi utvrđivanja stanja i odvođenja počinioca.

Ovim putem izjavljujem da prethodno navedene činjenice predstavljaju istinit prikaz opisanog događaja, i da nemam nikakvih dodatnih informacija.

Na dan, 22.02.2018. godine

Policija Brčko distrikta

Policajska stanica Brčko

IZJAVA POLICAJCA ALENA BOŠNJAKA

Na noć počinjenja krivičnog djela, 21.02.2018. godine, po povratku sa koleginе svadbe, u 1 sat poslije ponoći, svratio sam na benzinsku pumpu po gorivo. Prišavši ulazu u prodajni prostor, zatekao sam dva mladića u izvršenju krivičnog djela razbojništva. Jedan je držao prodavača na nišanu pištolja manjeg kalibra, dok je prodavač punio vrećicu sa novcem iz kase. Drugi mladić, kružio je po objektu sa baseball palicom i razbijao sve pred sobom. Po njegovom ponašanju i prijetnjama koje je uzvikivao, zaključio sam da je velika vjerovatnoća da je pod utjecajem droge i/ili alkohola.

Po procjeni situacije u objektu, odmah sam nasrnuo na mladića sa pištoljem kako bih neutralisao opasnost. Prišavši mu s leđa, prvo sam mu oduzeo pištolj, a zatim ga svladao na zemlju. Pružio je jak otpor i glasno psovao, što mi je otežavalo vađenje službenih lisica iz džepa. Kada sam uspio u tome, u trenutku stavljanja lisica, mladić je napravio nagli trzaj rukom, koju sam povukao unazad kako bih zaključao lisice. Taj potez je doveo do povrede ramena koja je utvrđena u Domu Zdravlja nakon dolaska hitne pomoći koje sam pozvao na lice mjesta. Drugi izvršilac je pobjegao iz objekta sa oduzetim novcem, dok sam ja bio zauzet kontrolišući mladića kojem sam oduzeo vatreno oružje.

Pozvao sam kolege koji su stigli na lice mjesta nakon 15 minuta, jer je saobraćaj bio privremeno otežan zbog teške saobraćajne nesreće. Nakon dolaska na lice mjesta, izvršen je uviđaj i utvrđeno činjenično stanje, a izvršilac priveden radi daljnijeg procesuiranja.

Ovim putem izjavljujem da prethodno navedene činjenice predstavljaju istinit prikaz opisanog događaja, i da nemam nikakvih dodatnih informacija.

Na dan, 22.02.2018. godine

Policija Brčko distrikta

Policajska stanica Brčko

NALAZ MEDICINSKOG VJEŠTAČENJA

BOSNA I HERCEGOVINA

BRČKO DISTRIKT

INSTITUT MEDICINSKOG VJEŠTAČENJA BIH

NALAZ MEDICINSKOG VJEŠTAČENJA BR. MD 3-02/18

U noći sa 21. na 22.02.2018. godine oko 2 sata poslije ponoći, u prostorijama Doma zdravlja Brčko obavila sam vještačenje povreda na desnom ramenu Marka Todorovića koji je doveden u Dom zdravlja u pratnji prdstavnika Policije BD, nakon što je lišen slobode zbog toga što je zatečen pri izvršenju krivičnog djela.

Nakon konsultacija sa dežurnim medicinskim osobljem Doma zdravlja koje je intervenisalo na sanaciji povrede i neposrednim uvidom i procjenom ozbiljnosti povrede, mogu iznijeti sljedeće zaključke:

1. Marku Todoroviću je medicinsko osoblje Doma Zdravlja Brčko ustanovilo teži oblik iščašenja desnog ramena, koje je hitnom intervencijom vraćeno (reponirano) u prirodni položaj i imobilizirano gipsom.
2. Utvrđeno je oštećenje hrskavice i koštanog ruba zglobne čašice i promjena vanjskog oblika ramenog obruča.
3. Vrsta povrede koja je utvrđena kod Marka Todorovića mogla je nastati samo primjenom sile višeg intenziteta, naglim povlačenjem unazad, koje je u potpunosti dislociralo rameni zglob, za čiju sanaciju je bila potrebna ozbiljnija intervencija.
4. Oporavak od ove povrede traje najmanje mjesec dana, nakon čega slijedi intenzivna elektro i fizikalna terapija u trajanju od najmanje dvije sedmice, radi ponovnog uspostavljanja pune funkcionalnosti ramena.
5. Zbog ozbiljnosti povde, nakon skidanja gipsa možda će biti potreban hirurški zahvat u cilju stabilizacije ramenog zgloba, o čemu će odlučiti doctor medicine zadužen za liječenje i praćenje oporavka povrijeđenog.
6. Postoji mogućnost smanjenja pokretljivosti desne ruke za 20%.

Uz ovaj nalaz prilažem rentgenski snimak povrede koji je nastao u trenutcima neposredno nakon dolaska Marka Todorovića u Dom zdravlja.



Izjavljujem da su gore navedene činjenice rezultat neposrednog, neutralnog i objektivnog vještačenja zasnovanog na naučnim činjenicama i kriterijima u širokoj primjeni u medicinskoj praksi.

Na dan 24.02.2018. godine,

U Brčkom,

Za Institut medicinskog vještačenja BiH,

Dr. Ivana Kovač

NALAZ PSIHIJATRIJSKOG VJEŠTAČENJA

BOSNA I HERCEGOVINA

BRČKO DISTRIKT

INSTITUT MEDICINSKOG VJEŠTAČENJA BIH

NALAZ PSIHIJATRIJSKOG VJEŠTAČENJA BR. MD 3-08/18

Na dan 27.02.2018. godine u prostorijama Policije BD obavila sam anamnezu i psihijatrijsko vještačenje Marka Todorovića koji je lišen slobode 22.02.2018. godine, a koji se tereti za izvršenje krivičnog djela razbojništva na benzinskoj pumpi "Gasco".

Pored redovnog medicinskog pregleda, uvida u zdravstveni karton, utvrđivanja porodičnog života i socijalnih prilika osumnjičenog, obavljen je i direktni razgovor sa Markom Todorovićem, sa ciljem utvrđivanja ličnosti i psihološkog stanja osumnjičenog, a u vezi sa stepenom uračunljivosti u momentu izvršenja krivičnog djela.

PROJENA MOTIVACIJE DJELA

Da bi se ozbiljno moglo procijeniti da li je neko shvatio šta radi da li je mogao da odluči da li će nešto da učini ili neće, moramo pokušati razjasniti psihičke pokretače ili motive koji su ga na to naveli. Motiv kao pokretač bilo koje radnje ili niza radnji može biti:

1. Normalnopsihooške prirode, što znači da potiče od od normalnog dijela ličnosti ili od zdravog načina reagovanja i rasuđivanja.
2. Psihopatološke prirode, što znači da potiče iz bolesnog izvora, iz poremećenog dijela ličnosti ili abnormalnog reagovanja i rasuđivanja.

Kod Marka Todorovića nema nikakvih psihopatoloških sadržaja, niti je takvih sadržaja bilo u vrijeme izvršenja ovog krivičnog djela, pa se na osnovu toga i načina na koji je djelo izvršeno, može se reći da se radi o motivu koji je normalnopsihološke prirode i koji je proizašao iz želje za nedozvoljenim sticanjem materijalne koristi.

ANLIZA IZVRŠENIH RADNJI

Kod analize radnji koje je Marko Todorović poduzimao pri učinjenju krivičnog djela koje mu se stavlja na teret, a na osnovu raspoloživih činjenica i procjene ovih faktora u odnosu na konkretno krivično djela, mišljenja sam da su ovdje u pitanju isključivo voljne radnje.

ZAKLJUČAK

Na osnovu svega što je naprijed rečeno, može se konstatovati sljedeće:

1. Sadašnje stanje zdravlja optuženog je takvo da kod njega nema elemenata privremene ni trajne duževne bolesti, privremene duševne poremećenosti niti zaostalog duševnog razvoja.

2. U vrijeme izvršenja krivičnog djela, koje se Marku Todoroviću stavljaju na teret, kod njega također nije bilo elemenata privremene ni trajne duževne bolesti, privremene duševne poremećenosti niti zaostalog duševnog razvoja.
3. Na osnovu raspoloživih činjenica, može se reći da se u slučajevima ovih krivičnih djela radi o motivima koji su potpuno normalnopsihološke prirode i koji su proizašli iz želje za nedozvoljenim sticanjem određene materijalne koristi.
4. Spoljašnji izgled optuženog je bez osobitosti, a držanje tokom razgovora spontano. Pokreti su skladni, bez ikakvih tikova i nepotrebnih gestikulacija. Izraz lica uz otvoren pogled je u potpunosti pratio tok razgovora. Postavljena pitanja je u potpunosti razumio i davao je adekvatne odgovore. Pamćenj za starije i skorije događaje je u potpunosti očuvano. Afektivno stanje i osnovno raspoloženje bili su adekvatni u odnosu na situaciju u kojoj se nalazi i na tok razgovora. Pažnju pravilno usmjerava i dobro održava. Neispoljava iluzije ni halucinacije. Voljna djelatnost mu nije oštećena. Intelektualni nivo je prosječan.
5. Iz analize načina na koji je krivično djelo izvršeno, može se konstatovati da su u pitanju isključivo voljne radnje.
6. Prema učinjenom djelu, Marko Todorović ne ispoljava očekivani stepen kritičnosti i kajanja.
7. Počinjeno djelo nije strano ličnosti Marka Todorovića.

Iz svega ovoga proizilazi i konačna ocjena da je Marko Todorović u vrijeme kada je izvršio krivično djelo koje mu se stavlja na teret bio u stanju da shvati značaj radnji koje je poduzimao, kao što je bio i u stanju da u potpunosti kontroliše svoje postupke, pa je samim time i njegova uračunljivost u tim momentima bila potpuna.

INSTITUT MEDICINSKOG VJEŠTAČENJA BIH

Brčko, 27.02.2018. godine

Prim. dr. Ines Pejović, neuropsihijatar

SLUŽBENA ZABILJEŠKA

POLICIJA BRČKO DISTRIKTA

Broj: 16/18 Datum: 22.02.2018.

SLUŽBENA ZABILJEŠKA

Sačinjena u prostorijama Policijske stanice

Dana 21.02.2018. godine u 01:30, po dojavi kolege van dužnosti Alena Bošnjaka upućen sam na bezinsku pumpu "Gasco" u Brčkom, gdje su u 01:20 Marko Todorović i Emir Kapetanović izvršili krivično djelo razbojništva, tako što je Marko Todorović pod prijetnjom vatrenim oružjem prisilio prodavača da mu preda novac iz kase, dok je Emir Kapetanović otuđivao robu u prodajnom prostoru i vandalizirao objekat baseball palicom. Na licu mjesta sam zatekao kolegu Alena Bošnjaka koji je svjedočio krivičnom djelu i savladao Marka Todorovića time što mu je oduzeo pištolj i stavio lisice, držeći ga pod kontrolm do dolaska naše jedinice. Predata mi je sportska torba sa robom koju su učinitelji namjeravali iznijeti iz objekta. Prije privođenja u P.U. Brčko, Marko Todorović je odvezen u Dom Zdavlja radi sanacije iščašenog ramena, povrde koja je nastala zbog otpora prilikom lišavanja slobode. Emir Kapetanović je uspio pobjeći sa ukradenim novcem.

U objektu je počinjena materijalna šteta čija će se vrijednost utvrditi naknadnim procjenama.

U narednom periodu slijede utvrđivanje činjeničnog stanja i podnošenju krivičnih prijava i podizanju optužnica.

Zabilješku sačinio/la

ZAPISNIK O UVIĐAJU

BOSNA I HERCEGOVINA

BRČKO DISTRIKT

POLICIJA BRČKO DISTRIKTA

Broj: 47/18

Brčko, 23. 02. 2018. godine

Sačinjen dana 23.02. 2018. godine u službenim prostorijama Policije BD povodom izvršenog krivičnog djela razbojništva benzinske pumpe "Gasco" u Brčkom. Dana 21. 02.2018. godine, u 01:29, PU Brčko je obaviještena, od strane operavnog dežurnog Policije BD o navedenom krivičnom, kao i dežurni tužilac Tužilaštva BD, koji je izašao na lice mjesta i rukovodio uviđajem, a radi vršenja uviđaja na lice mjesta izašli su i:

- ovlaštene službene osobe Policije BD
- dežurni krim tehničar Policije BD

Lice mjesta do dolaska uviđajne ekipe bilo je osigurano od strane službenika Policije BD. Uviđaj je počeo dana 21. 02. 2018. godine oko 01:45. Dolaskom na lice mjesta konstatirano je da je na prodajnom prostoru benzinske pumpe počinjena značajna materijalna šteta, u vidu razbijenog inventara (uključujući vrata dva frižidera, šest policaja i tri prozora).

Jedan od izvršioaca je zadržan na licu mjesta od strane policajca u civilu Alena Bošnjaka, dok je drugi izvršilac pobjegao sa mjesta zločina sa ukradenim novcem (u iznosu od najmanje 2000 KM).

Po dolasku ekipe za uviđaj, Marko Todorović, jedan od izvršitelja, bio je na putu ka Domu Zdravlja radi saniranja povrede isčašenja ramena koja je nastala zbog opiranja prilikom stavljanja lisica od strane Alena Bošnjaka. Na licu mjesta je zatečena sportska torba sa robom koju su izvršitelji namjeravali otuđiti iz objekta. Na licu mjesta je pronađen i pištolj manjeg kalibra (9 mm) koji je korišten u toku razbojništva, kao i baseball palica kojom je vandaliziran objekat.

Radnici krim tehnike Policije BD su izvršili fotografiranje lica mjesta, i preuzeli snimke video nadzora koji pokrivaju relevantno vrijeme učinjenja krivičnog djela.

Uviđaj završen dana 21. 02. 2018. godine oko 02.45.

Zapisnik sačinio/la

OPTUŽNICA

TUŽILAŠTVO BRČKO DISTRIKTA

Brčko distrikt

Broj: KT – 88/18

Brčko, 16. 03. 2018.

OSNOVNOM SUDU BRČKO DISTRIKTA U BIH

- sudiji za prethodno saslušanje -

Na osnovu člana 226. stav 1. Zakona o krivičnom postupku Brčko distrikta Bosne i Hercegovine (u daljem tekstu: ZKP BD), podižem

OPTUŽNICU

Protiv:

Marka Todorovića, rođen 16.05.1997. godine, u Brčkom, nezaposlen, po struci ekonomski tehničar, privođen dva puta od strane pripadnika Policije BD 2016. i 2017. godine zbog narušavanja javnog reda i mira, nije služio zatvorsku kaznu, trenutno se protiv njega ne vodi drugi postupak.

Što je:

U noći sa 21. na 22. 02. 2018.godine, 01:15 sati, pošto je utvrdio slab nadzor nad benzinskom pumpom „Gasco“ u Brčkom pod prijetnjom vatrenim oružjem učestvovao u razbojništvu benzinske pumpe, otuđenjem novca i robe više vrijednosti. Emir Kapetanović ih je u privatnom vozilu, marke Audi A4, u vlasništvu S.K., dovezao na mjesto zločina, koje je poslije iskoristio za bjekstvo sa ukradenim novcem. Po ulasku u objekat, u rukama su imali pištolj manjeg kalibra (9 mm), koji je Marko Todorović koristio za zastrašivanje i iznuđivanje novca od prodavca pod prijetnjom neposredne životne opasnosti, i baseball palicu koju je Emir Kapetanović koristio za zastrašivanje i nanošenje materijalne štete objektu. Novac koji je Marko Todorović pod prijetnjom vatrenim oružjem iznudio od prodavača benzinske pumpe nije pronađen kod optuženog i sumnja se da je u posjedu Emira Kapetanovića koji je u bjekstvu. Emir Kapetanović je paralelno sa radnjama Marka Todorovića otuđio 20 kutija cigareta, marke „Walter Wolf“, i baseball palicom vandalizirao inventar objekta, pri čemu je značajno oštetio dva frižidera, šest polica i tri prozora. Imovinska šteta na objektu se procjenjuje na 5000 KM. Imovinska korist koja je pribavljena krivičnim djelom razbojništva i razbojničke krađe procjenjuje se na 2000 KM.

Dakle, da je tuđu pokretninu oduzeo drugom, ulaskom u tuđi prodajni objekat, pod prijetnjom vatrenim oružjem, istovremeno nanoseći materijalnu štetu objektu upotrebom opasnog predmeta, s ciljem da njenim prisvajanjem pribavi sebi protivpravnu imovinsku korist.

Čime je, kao supočinioc, izvršio krivično djelo Razbojništvo propisanog Članom 283. stav 2. KZ Brčko distrikta Bosne i Hercegovine (u daljem tekstu: KZ BD).

Radi toga, tom sudu kao stvarno i mjesno nadležnom, stavljam

PRIJEDLOG

dokaza koje treba izvesti na glavnom pretresu

1. Predlažem da se na glavnom pretresu saslušaju:

- Svjedok – prodavač benzinske pumpe „Gasco“
- Svjedok – Alen Bošnjak, policajac P.U. Brčko
- Vještak psihijatrijske struke

2. Da se u dokaznom postupku pročitaju:

- Zapisnik o uviđaju Policije Brčko distrikta, P.U. Brčko broj 47/18, od 22.02.2018. godine
- Krivični podaci za osumnjičenog.

1. Da se izvrši uvid u:

- Fotodokumentaciju P.U. Brčko Ph-2234/01-18 os 21.02.2018. godine sa lica mjesta.
- Video zapis nadzorne kamere benzinske pumpe „Gasco“.
- Pištolj manjeg kalibra (9 mm)
- Otuđene cigarete marke „Walter Wolf“ (20 kutija).

Rezultati istrage

Rezultati provedene istrage pružaju sasvim pouzdan osnov za zaključak da je osumnjičeni izvršio krivično djelo razbojništva, koje mu se ovom optužnicom stavlja na teret, na način поближе opisan u dispozitivu optužnice.

- Iz iskaza svjedoka sa mjesta učinjenja krivičnog djela proizilazi da je optuženi (u društvu sa još jednim licem koje je u bjekstvu), izvršio navedeno kivično djelo razbojništva. Lica koja su dala iskaz su neposredno svjedočila izvršenju krivičnog djela i doprinijeli sprječavanju osumnjičenih od udaljavanja sa lica mjesta. Ovi iskazi su prioženi uz optužnicu u pismenom obliku. Navedeni iskazi su potvrđeni zapisnikom o uviđaju 47/18 Policije BD, P.U. Brčko službenom zabiljškomo P.U. 16/18 Brčko, fotodokumentacijom sa uviđaja i video zapisom relevantnog događaja sa nadzorne kamere benzinske pumpe „Gasco“,koje se također prilažu uz optužnicu. Na uvid i vještačnje se također prilaže pištolj (9 mm) koji j korišten pri izvršenju krivičnog djela razbojništva i razbojničke krađe, 20 kutija cigareta marke „Walter Wolf“ koje je Emir Kapetanović otuđio u toku krađe.
- Kod ovakvog stanja stvari, smatram da ima sasvim dovoljno dokaza za osnovanu sumnju da je osunjičeni, izvršio krivično djelo, koje im se stavlja na teret ovom optužnicom, zbog čega se i traži od suca za prethodno saslušanje da ovu optužnicu potvrdi.

Priloženi materijali koji potkrepljuju navode optužnice su:

1. Zapisnik o uviđaju Policije Brčko distrikta, P.U. Brčko broj 47/18, od 22.02.2018. godine
2. Službena zabilješka P.U. Brčko od 21. 02. 2018. godine.
3. Zapisnik o ispitivanju osumnjičenog Todorović Marka
4. Zapisinik o saslušanju svjedoka prodavača benzinske pumpe „Gasco“
5. Zapisnik o saslušanju svjedoka policajaca Alena Bošnjaka, P.U. Brčko
6. Nalaz psihijatrijskog vještačenja br. MD 3-08/18
7. Fotodokumentacija P.U. Brčko Ph-2234/01-18
8. Video zapis nadzorne kamere benzinske pumpe „Gasco“
9. Pištolj kalibra 9 mm
10. 20 kutija cigareta marke „Walter Wolf“
11. Izvod iz krivične evidencije za osumnjičenog, dostavljen putem faksa.

GLAVNI TUŽILAC
